

Pai atu ana kupu ki te whakarongo atu a te pakeha a te Maori. He nui hoki ana mihi ki a Atirikona Hamiora Wiremu, ki a Te Tatana, kia a Mr. Loten, ki te tangata i rite atu tona ahua ki te Tatana.

I whai kupu ano hoki a Mr. Russell, te tiamana o nga Kai-tiaki o te kura, i mihi ki nga manuhiri o tenei ra nui.

I reira hoki a Te Makarini te tangata nana i hanga te Makarini Karahipi hei whakamahara ki tona papa.

HUI MO TE PIHOPATANGA

I tu te Hui a te Hinota o Aotearoa ki Ohinemutu, Rotorua, i te 1 o nga ra o Machi 1927.

Ko Rev. P. Peneti te tiamana. Ko nga tangata enei i tae mai:—

Nga Minita: W. H. Keretene, P. Hakiwai, K. T. Harawira, W. N. Panapa, me Peneti.

Nga Mangai-reimana: Hon. A. T. Ngata, T. Paraone, T. Tane, W. Kingi.

(I Rotorua ano a Revds. T. Tokoaitua me P. H. Leonard, engari kaore i tae maraana atu te whakaatu mo te haora e timata ai te hui.)

He mea whakapuare te Hui ki te inoi.

Ka mutu te panui i te rarangi ingoa, ka whakamaramatia mai e te Tiamana te putake i karangatia ai tenei Hui.

Ka pootitia ko Rev. W. N. Panapa hei Hekeretari mo te Hui.

Ka panuitia nga mihi a te Atipihopa ki te Hui.

Ka panuitia te rota a te Atipihopa o Canterbury (te upoko o te Hahi Mihingare puta noa te ao) i tuku mai ai ki to tatou Atipihopa mo tenei take.

Ka panuitia te whakamarama a te roia o Ponoke, a Mr T. P. Martin mo nga kaupapa hohonu i roto i te motini i tono ai nga Maori ki tetahi Pihopa-awhina mo ratou, i te hui i tu ki Ponoke i te 6 o nga ra o Akuhata 1926.

I tu katoa nga memaki te korero, ki te whakaatu i nga whakaaro o tena hapu, o tena hapu.

Te mutunga ka whakatakoto a A. T. Ngata i te motini, na P. Peneti i tauitoko:—

"I te mea kua panuitia ki tenei Hui nga whakaaro o nga tangata nui o te Hahi, me nga whakamarama a tetahi o nga roia mohio ki nga kaupapa whakahaere i te Hahi, ka whakapanuitia e tenei Hui te motini i paahitia e te Hui i tu ki Ponoke i te 6 o nga ra o Akuhata 1926.

Ahukoa kaore i te kotahi te whakaaro o nga mema o tenei Hui me pakeha, me Maori ranei te tangata tika hei Pihopa tuatahi mo Aotearoa, otira e whakaatu ana tenei Hui, ko te whakaaro o te iwi nui tonu, me Maori taua tangata."

Paahitia ana.